

光緒山西通志

鄉賢錄十七

錄二之十七

山西通志弟百三十三

賜進士出身頭品頂戴兵部侍郎兼都察院右副都御史巡撫山西提督軍務張爾皋
旨監修

國朝

順治

桑芸字笈雲榆次人幼家貧借書讀之輒不忘爲文閎肆袁
督學繼成亟賞之崇禎己卯舉於鄉庚辰成進士

國初補行人司行人掌司事尋擢貴州道御史巡按畿輔謫
浙臬幕官超遷大理寺正厯光祿寺卿復外補汝南參政墾
荒土數千頃除無藝供數千兩積猾白福德肆爲不法廉得
之將寘諸理橐千金求免大聲叱去立斃杖下懽頌聲載道
遷廣西按察使桂林守兵素橫贊痛繩以法不少貸比入覲
世祖召見詢地方利病亟稱之遷河南右布政攝左布政不數

月遷廣東左布政行至南昌卒芸蒞政果斷而佐以詳密爰
厯中外所至咸樹聲績卒後

賜祭二壇造墳安葬卹典獨厚

胡全才字體舜文水人明崇禎進士授兵部主事順治元年
都統葉臣招撫山西疏薦起用原官二年由兵部郎中授陝
西漢羌兵備道時西安及漢羌並遭賀珍寇掠全才旣之任
撫綏凋瘵安輯流亡招徠明漢中總兵趙光遠所遣部將齊
陞王明德李世勳等輸誠効命盡收其所屬軍械與知府楊
可經同知董應徵通判李芳滋推官原體蒙飭練士卒積聚
芻糧爲警備之策賊復突至圍城齊陞等奮勇衝擊李世勳
中流矢沒於陣全才固守危城三十餘日賊環攻益急全才
誓衆死守會大兵赴援賊渠遁走漢中得全於是工部侍郎

趙京仕言漢中爲三秦咽喉重地宜設撫臣且薦全才足副嚴疆之任事下部議尋議全才蒞任撫衆有方曾蒙

諭旨嘉獎繼復誓守危城金湯保固應破格超擢以勵忠勤三年十月奉

旨擢授甯夏巡撫四年五月以邊方當兵燹之後書籍散軼士子無由誦法奏頒

本朝律典及性理通鑑諸書示令傳習六月疏言甯夏地逼夷人習俗强悍舊例額兵三萬有奇營分奇正正兵以總兵官統之奇兵以中協副將統之凡調征居守遞代而行其鎮衝要防山寇則中參將任之經今舊兵已裁其半無中協中衝之官故往者鎮臣奉調遂有叛將王元殺巡撫焦安民之變請仍舊制設官廣增兵額以資守禦又以調征興慶之副

將馬甯曾擒斬王元軍民畏服請仍補中協副將事下部議
並如所請八月王元逆黨馬德受撫復叛縱兵肆掠全才與
總兵劉芳名等發兵進勦戰於預望城南斬級千餘賊趨慶
陽山岡是日大雨如注疾追百七十里賊衆潰散馬德猶揮
殘卒負險而戰副將劉登樓等復敗之賊夜遁明日偵知賊
據河兒坪馳師擊之斬馬德於陣餘黨悉平是歲山陝河南
皆有飛蝗全才授以捕法所至輒盡田禾無傷因以其法上
聞請著爲例傳示各省

上可其奏初全才任漢羌時令漢中有受賀珍僞劄者並自首
月給委劄如其官爲收復人心計嗣又揭告漢羌總兵尤可
望苛罰冒餉藏匿僞官等款可望既得罪因訐全才以擅給
劄付及濫刑斃命事全才亦坐革職九年全才復控理前罪

部臣議以功大罪小應降補參議職從之十年二月授江西饒南道六月經略洪承疇稔其才請隨征湖南尋奉

命撫治鄖陽提督軍務時流賊餘黨郝搖旗劉體純等憑恃房竹山嶺險隘出沒鄖襄歲無甯宇全才扼其衝要嚴守禦復馳至穀城南漳相形勢列營檄諸將進討會潯河廟灘白土關諸戰先後奏捷賊黨解散十三年二月明桂藩總督李企晟潛入鄖陽與郝搖旗謀合山西陝西河南山東諸賊黨作亂全才遣千總朱光祚等密捕之遂獲企晟及其勅書關防印劄以

聞企晟伏誅十月

命總督湖廣軍務十一月以疾卒於官

詔贈兵部尚書

賜祭葬如典禮諡勤毅

劉祚長清源人壬辰進士授湖廣宜城縣知縣縣當水陸衝俗疲民瘠祚長撫綏有法以最行取戶部主事旋監察通州倉務升山東北河道搜剔奸弊風裁肅然歸里日足不履公門獎掖後進造就甚多祀忠孝祠

溫而厲字中之徐溝人弱冠入邑庠順治五年姜逆據大同叛山賊四出劫掠脅至太原晉祠幾不測而厲神色不撓責以大義賊衆服其膽咸曰義士也禮遣歸九年選拔貢生任山東茌平縣丞墾荒田百餘頃以修河功升江南句容知縣時軍務叢集嘗於馬上判事邑人頌爲神君尸祝之卒於官孫世謐字丹臺興縣人工文而勇精騎射順治初以貢司訓臨縣遷垣曲教諭再遷知崇仁縣縣大盜羅漢七聚衆萬餘

前令將勦之謀泄遇害世盡至念縣人胥通盜無可共事者
獨與其僕密謀之而陰厚千總孟暨驚提胥吏乃佯爲怙怯
遣人語漢七曰功令不勦盜者軍法從事今縣小無兵吾且
降幸將軍至某鎮與吾面計事及期漢七率衆二千駐鎮外
偕其黨吳暨校三十入鎮世盡設廣筵宴校廳外迎漢七暨
吳於廳而徐呼千總來漢七色變則命千總解刀勸飲飲極
歡復移尊於園世盡揮僕曰吾與將軍有密言爾曹不得聞
搗漢七手入園猝撲之仆地吳拔刀千總亦自後撲仆之而
僕急入縛二賊乃召驚捷胥吏授以弓絃曰吾出勸三十人
酒汝何後侯吾擲杯彼仰觀汝卽以絃扼其喉如法縛二十
五人而逸五人去曰吾無兵怖之可胥走也二千人果遁明
日率鄉勇擣巢則巢胥空矣事平撫按議交章薦世盡以老

力請歸卒年六十有五

傅山字青主別署公之它又字晉廬少與孫忠靖公傳庭共學讀書過目成誦明季天下將亂諸號爲搢紳先生者多腐惡不足道憤之乃堅苦持氣節不少婢娶提學袁繼咸爲巡按張孫振所誣孫振閹黨也山約同學曹良直等詣通政使司三上書訟之不得達乃伏闕陳情時巡撫吳牲亦直袁竟得雪山以此名聞天下馬文忠世奇爲作傳以爲裴瑜魏劭復出也蔡忠襄懋德撫晉寇已亟講學三立書院亦及軍政軍器之屬山往聽之曰迂哉公言非可起而行者也甲申國變夢天帝錫之黃冠乃衣朱衣居士穴養母明年袁自九江羈燕邸以難中詩遺山曰不敢愧友生也山省書慟哭曰嗚呼吾亦安敢負公哉甲午以牽連被逮抗詞不屈絕粒九日

幾死門人有以奇計救之者得免天下大定始以黃冠自放稍稍出土穴與客接工篆隸書畫趙秋谷推其書爲

本朝第一顧深自愛惜不輕爲人寫母喪貴官致賻作數行謝之貴者喜曰此一字千金也吾求之三年矣旣絕世事而家傳故有禁方以善醫聞遂於脈理而時參以儒義康熙戊午

詔舉博學鴻詞給事中李宗孔以其名薦時年七十有四矣固辭不可乃稱疾有司令役夫舁其牀以行二孫侍將至京師三十里以死拒不入城於是馮相國溥首過之公卿畢至山臥牀不具迎送禮魏尙書象樞乃以其老病上聞詔免試放還

命加中書舍人以寵之及歸相國以下皆出城送山歎曰今

而後其股然無累哉既而曰使後世或妄以劉因輩賢我且死不瞑目矣歸後大吏咸造廬請謁山自和 冬夏著一布衣帽以氈或曰君非舍人乎不應也及卒以朱衣黃冠歛所著有霜紅龕集行世子眉別有傳

楊義洪洞人明崇禎進士官山東聊城縣知縣

本朝順治元年義歸誠選補河南汝陽縣知縣五年以行取擢江西道監察御史巡視浙鹽義以兩浙鹽法玩弛疏陳行鹽掣驗之法請遴選清廉有司照引盤驗御史親臨監掣以除積弊從之八年睿親王身後重得罪義因劾工部侍郎李迎峻前任營繕郎中時督造王府第雕鏤奇異僭擬禁廷獻媚邀榮不數年間躋陞華廡請勅部治罪疏入有

旨下部部以迎峻事在赦前例得免議事遂寢是歲復巡視
長蘆鹽政疏劾運使趙秉樞貪酷執法事秉樞削籍逮繫明
年奉

命督學江南尋掌京畿道事十一年大學士陳名夏以罪伏
法議因劾告病在籍侍郎孫承澤注時與名夏同掌銓衡頗
倒是非交相黨附部議令承澤休致時吏部尚書劉正宗特
薦降調員外董國祥才守可用擬銓文選郎中義面詰正宗
專擅卽具疏劾之正宗得

旨察議國祥卒以贓敗謫徙尙陽堡十二年正月奏陳時務
四事一大臣廉恥宜養伏見輔臣呂宮嬰疾日久依違苟合
負曠職愆乞允其早歸田里以勵臣節一督撫巡行宜慎巡
按差旣停止則凡閱城審錄諸事督撫必按期巡行然身擁

節鉞恐隨從過多致滋擾累嗣後止量帶兵丁承舍一十餘名仍舊關防嚴密禁其搔擾滋事一兵民匱乏宜恤請開各州縣廩生捐銀准貢之例以所納銀給滿洲兵備鞍馬器用餘賑被災貧民一無名私派宜停賦役原書起存自有原額
屢蒙

諭旨嚴禁加派乃有司抗不遵行如臣邑洪洞地畝正糧外又加驛站坐司馬夫工食公費色名幾半正項一邑如此他邑可知祈

勅督撫嚴行禁革會呂宮已得

旨致仕餘下所司議行是時

詔復御史巡方之職義復奏請弗拘資俸宜甄舉才守兼優堪勝激揚之責者考試列名請

旨簡川四月擢太僕寺少卿七月轉大理寺旋授大理寺卿十一月遷刑部右侍郎明年轉左又明年八月請假省親假滿補工部左侍郎十七年三月轉總督倉場戶部左侍郎七月陞工部尚書康熙元年致仕卒於家

上官鉉字三立冀城人兄鉉順治己亥進士鑑丙戌進士鉉最少而成進士在前明癸未爲最先

國朝順治二年授中書充陝西鄉試副考官五年遷山東道監察御史巡按湖南八年巡按江甯疏請查高淳縣水衝浮糧改征折色以蘇民困請裁蕪湖鈔關保家及委員並巡兵幫役以肅商稅江甯滿漢官兵歲需馬草請歲差各郡糧官採辦以省州縣運送之勞江西浙江兩省站銀請統於江浙藩司彙解江南驛傳道以恤驛站賠累之苦又疏言鳳陽府

屬荒地宜令有司及時勸墾江甯所屬英武秣陵廣武三衛屯糧山阻道艱宜省運費改征折色諸疏並下部議行母憂歸尋遭父憂服闋補湖廣道監察御史掌河南道先是丁酉科江南鄉試考官方猶錢開宗以取中不公致諸生鬩辱同考官奉

旨革職提問至是鉉復疏參請覆試江南新科舉人以核真偽從之尋會鞠得實考官案誅如律舉人程度淵等發遣有差又以河南邪教蔓延請

敕撫按稽察州縣失察者糾參治罪得

旨嚴飭行又疏陳定臺規慎刑名考選臺臣考取巡方四事及計典四款之註事實察委署類皆政要十八年遷順天府府丞康熙三年轉大理寺少卿六年授大常寺卿十年遷宗

人府府丞旋擢左副都御史疏言臣前掌道時管理軍政各省提鎮計七十員數十年來幾至百員總鎮以上體統已尊祿位已極輒不肯實心効力徒糜百萬金錢云云意蓋在平西諸藩也以未能指名糾參節議照條陳不實隱舍議刺例降二級調用補太常寺少卿尋請假歸未幾吳逆變作時以鉉爲有先識云家居十年卒

晉淑軾字長眉號積菴洪洞人丙戌進士知中牟縣邑多盜設鳴鐘合擊法聞鐘聲捕役鄉保輒視所向掩捕盜胥獲以治行最行取兵科給事中尋轉工科疏請安插流民又請會勦裨沙羊山海寇出知大名府時巨寇任鳳亭巢踞四省界議招撫衆不敢往獨攜一役徑抵巢宣布

朝廷德意鳳亭感泣解甲聽命唯謹歸途寇王爲指揮所擒

請如鳳亭例曰被擒求撫不可解轅門辟之而疏奏鳳亭授副將五臺寇高山聞之亦就撫於晉焉擢順天府府丞遷鴻臚寺卿

特簡通政使司通政使以病請歸里卒年甫四十有九人多惜之

上官鑑字金之翼城人順治丙戌進士授潞安府教授河南聘同考拔七人五成進士遷國子監助教再遷戶部主事督餉陝西散給軍士不私秒忽羨選吏部主事司考功銓政一新尋以郎中出爲浙江嘉湖僉事選參議河南督理河道故事河工近出夫遠出料殫慮經畫歲省金錢數萬復兼理通省驛傳鹽法詳請驛站銀在州縣支給協濟州縣悉改解藩司抵州縣支給正項官民便之旋復以薦兼管開歸河三府

分守道事務解組歸無疾卒著一經樓集藏於家

王廷諫翼城人順治丙戌進士官行人司行人考選兵科給事中歷禮戶科出爲陝西榆林兵備道遷山東按察使司按察使請告歸廷諫少工文任行人同考順天鄉試任兵科主考湖廣鄉試稱得人在諫垣持論侃侃嘗具疏請罷禁中佛塔得

俞旨一時稱盛事焉兵備榆林捐俸買牛種給民開墾又繪圖詳秦撫請墾田胥緩起科攝東路築石堤禦河神木人名王公堤按察山東多所平反歸不問戶外事十餘年卒

張鳳起字羽王翼城人幼孤家窶甚母績紡佐讀甲午舉於鄉乙未成進士授棗強知縣時土盜大肆標掠令各鄉團練互相救援盜不得逞梟兵白鶴年等假盜行劫立杖之死擢

御史值大校南旋沿途索役夫多至七千餘名露章言狀得
豁免又疏陳監引利弊士風澆漓皆闕時政按部河南約法
十二章與官吏相更始差停還京聞母病乞終養起補掌京
畿道印協理大計極口言糾參不實有礙計典請嚴行黜革
直聲大著或危其太峻諷之曰人當知止獨不計曩貧時耶
正色謝之曰貧吾故物豈以一官易初志哉以疾乞假歸卒
祀鄉賢

張元聲字聲希襄陵人順治甲午舉人任密雲縣知縣地近
邊鄙婦女不習織紡命僕婦教之時察其勤惰久之機聲四
起境內軍民雜處冒旗假逃者甚夥累及無辜元聲嚴緝審
解不畏權勢一時有鐵漢之目及休致家居一以造就後進
惠愛閭里爲事卒祀忠義

李宏敏字尊生太平人順治乙未進士授臨川知縣愛才禮士故老時英無不心折時海氛不靖吳越間警報時聞餉徵旁午鄰邑多獲戾而臨川調集從容民不知兵上游嘉焉將薦之性淡於榮利遽辭歸訓子姪族黨甚有禮法鄉俗婚嫁動爭財聘侈妝奩力矯之率以節儉久之陋風遂革著有百祿堂存藁卒祀鄉賢

劉漢卿翼城人順治初以諸生簡知耀州甫蒞任劇賊王永強率黨數千人集城下漢卿督吏民力守聞出奇兵擾之賊驚遁尋監郃陽軍招降七十餘寨有和陽寨者民避兵地也都統指爲賊藪將殲之泣勸再三乃止賊掠婦女悉棄去檄解軍前力請歸其夫遷保寧同知秦兵戍川者譁於廣元馳騎入其壘曉以大義治首惡如法事旋定擢肇慶知府尋以

艱歸漢卿工書法偕薛鳳鳴張臺等胥工文尤敦儉素嘗曰
儉美德也居官可以助廉居家可以佐勤當時以爲名言
王巖字惟肖猗氏人明崇禎庚午舉於鄉嘗慕文中子爲人
不樂仕進以倡明道學爲己任庚辰歲大祲出粟振貸全活
無算及逆闖過縣毒痛搢紳巖蒙難鄉民不期而集者數千
人投賊營保之獲免賊又欲授以偽職巖以毒藥敷面詐病
乃已己丑土寇陷城令出走寇將屠令家巖遣謀者說其魁
釋之既而令挾兵至且屠城巖單騎迎令言猗人無反狀令
亦偵知其家無恙遂爲戢兵又說令出軍中子女悉還其家
亂定乃出資完葺學宮立觀生書院三河人士請業者趾相
錯遊其門者率砥礪名行彬彬儒雅後多爲名臣人以爲有
河汾遺範著書甚富從子含真能傳其學並祀鄉賢含真字

思文丙戌副貢舉辛卯鄉試計偕入都遽卒於京邸當世惜之

衛紹芳字復菴猗氏人乙酉丙戌聯雋進士知尉氏縣行取兵部主事累任漳南道僉事撫寧化賊黃素禾永定廖明祈倚險爲亂決水灌之賊宵潰轉川北道參議郝承裔之變總督李國英檄督餉協剿兼程至嘉定三月賊平敘功轉督貴州學政崇雅黜浮以薛文清王文成語錄訓士士貧者捐俸賑之遷浙江巡海道致仕卒子旣齊別有傳

郭四維字岫公猗氏人丁亥進士由績溪知縣擢禮部主事遷河南驛道歷河西道參政補蘇州府知府守廉政惠才識敏練吳人感其德建祠虎邱至今尸祝之

王景震字四知萬泉人由舉人中壬辰明通榜授長安縣令

取介沈毅政聲甚著爲諸生時嘗請免生員故後門差歲荒發粟振貸及之官視於河神誓不苟取一錢長安志稱其絕請託鋤强豪訓俗以仁讓爲本課士以德行爲先云云祀鄉賢

荆之茂字峩侯猗氏人壬辰進士授新喻令兵變後民困誅求野多曠土之茂繪圖上請設法墾荒流亡漸集喻民戴之如父母善居鄉里族黨婚葬多所周恤卒祀鄉賢子四次益社靈璧知縣

薛之彬萬泉人性至孝童年喪父哀毀不食者七日家素貧耿介自持不事干謁聚徒講授寒暑忘倦既以甲午拔貢令濟陽招集流亡力除夙弊三載不受一錢致仕歸至不能備騎乘布衣疏食與窮居授徒時無異也年七十五卒祀鄉賢

濟人亦請入名宦祠

馮皋彊永濟人順治乙未進士同知漢中府吳逆之變隨大軍進討至擂鼓臺爲賊所獲誘之降授以僞職不屈曰吾爲王臣今被擒惟一死是求餘何言賊不忍殺閉幽室中復以威劫之則嘆曰頭可斷舌可拔彼睢陽常山豈直古之人哉賊知不可奪囚古寺閱五年不少屈洎奮威將軍復漢中大將軍圖陝督哈具疏上聞

命原官錄用皋彊以老投劾歸卒於家

張含璚字荆函蒲州人幼端凝有文望補潼關衛諸生丁酉中陝西鄉試己亥成進士授建昌府推官檢視案牘夜分不少倦讞鞠以片言折之咸叩頭誓服大豪黃某睚眦殺人捕置於獄暮夜餽千金祈少緩不許卒伏辜缺裁改陽春知縣

縣介萬山爲渠黨嘯聚地請於督府團結義勇親搗其巢穴城守某弁激變兵士洶洶單騎入營招首領諭以禍福置豎千百言衆始投戈泣下以艱歸服除補宜興知縣裁兩月卽以病乞休而士民胥頌之家居十年杜門卻軌里黨推爲祭酒卒後崇祀盱江書院

于彌字允調長治人丙戌進士授南安府推官攝豐城瑞金寧都三縣篆所至有循聲艱歸補袁州府推官治行最入爲江西道監察御史巡視西城疏請裁道標以節浮費變藩產以助軍需設海防屯田以安士著胥侃侃中名實補福建道監察御史首疏請開經筵旋掌山東道巡視東城以年例轉廣東嶺西參議道未幾裁缺歸里閉門謝客厯三十餘年以卒鼎立朝敢言而抗疏辨潞焚機罷市事夙弊遂除邑人賴

之

呂和鐘字大呂長治人幼負奇氣有器識不隨人俯仰領順治八年鄉薦任襄陵教諭旋以乙未登第例當授官乃喟然曰人非熟讀史書何以經世遂還山居數年授工部主事佔計壇工立議不移抽分龍江奉差荆關屢辦機務區畫盡善商民無擾以考最擢員外郎遷郎中

賜乳茶大緞榮寵有加轉按察司僉事督學陝西京有要津類多掣肘和鐘以冷面禦之一無瞻顧秦人素悍遇考試有劫生刁習力爲懲治乃息興安路險士子就試往往飢寒斃途中或飽狼虎和鐘憐之躬赴其地就試婦孺皆梯屋而觀以得識面爲幸其深仁厚澤秦人至今猶樂道之

傳作楫孝義人明崇禎進士除慶都令抵任未二十日值閭

賊之變將以死殉其子泣以大父母年高強之歸里侍養二十載以孝聞

國朝順治六年邑人張永錫父子作亂迫脅不從逃竄西鄉山中賊平大將軍手諭招之禮遇甚厚欲大用作揖以老疾固辭入城見尸橫道中悉爲掩埋收養逃亡男婦百餘口逕遣歸家不受一錢謝終身以讀書飲酒爲樂著銘心集二十卷行於世

趙永祚汾陽人丙戌進士授雷州府推官性剛決執法不阿雷民時多匿山谷隸邑庠諸生裁百人永祚得通文義者二百人附於學親爲督課雷人始知讀書盜王翰肆焚掠與同知周燦詣其巢開誠撫諭翰投戈補慶陽府推官亦以清敏著卒後囊橐蕭然人稱廉吏

師佐字靖公永甯人壬辰進士知福甯州招流亡嚴差役爲
文以驅虎患民立祠祀之遷蘇州府督糧同知釐漕蠹卻漕
規與糧戶約曰爾曹省一釐旁費則完一釐正供民恪遵之
三督漕運解餉江廣疏濬吳淞勘荒履畝胥殫厥職督撫兩
疏薦會病卒蘇人痛悼焉

于成龍字北溟永甯人順治十三年以副貢知羅城縣羅城
煙瘴地官廨在叢箐間插棘爲門虎白晝行庭中乃累土爲
几案旁置爨釜一盂一召吏民從容問疾苦皆感其至誠益
樂就爭輸田賦初鄰徭歲率三四至殺掠人畜成龍嚴保伍
勒鄉兵將搗其巢徭懼自投不敢復犯界數遣子女問安每
春時命兩徭舁竹舉行田野中見力耕者輒呼與語相勞苦
民率婦子羅拜或坐樹下與飲食笑語歡如家人獎勤扶惰

民大勸在羅城七年招流亡修學校增陴浚隄定昏喪之制以卓異遷知合州羅人遮道呼號追送數百里一眇者獨不去問故曰民習星卜度公橐中裝不能及千里民技猶可資以行也竟賴其力達合州州領縣三遺黎才數百人正賦十五兩而供役繁重府帖下取魚成龍曰民窮極矣安所得魚卒不與且極陳民困狀盡裁革之一僕一羸馬自隨貸牛種招集流亡旬月間得戶千計再遷黃州同知駐岐亭地多幽壑江湖爲盜窟成龍捕得九人大集諸父老曰能保後不爲盜者賞之保二人其七人卽諸父老前取大索駢繫悉阮之眾股栗又獲巨盜彭百鈴賞其罪令捕盜自贖無脫者巡撫張朝珍器之舉卓異吳三桂反檄攝武昌府事問禦亂策成龍言安人心莫先下令停徵張已草奏意與合遂盡以兵

事屬之時大軍雲集供億皆叱咄辦惡少憑禁旅爲姦立置之法白大將軍申軍令甲士擁之譁不爲動徐斂去謀指武昌大姓通賊以藏兵器爲徵成龍言巨室多避兵梁子湖藏械備他盜無足怪跡之果無他遷知建甯府奏改武昌大兵征岳州檄造浮橋於蒲圻賊驟至成龍入城守橋以山水暴漲圯坐罷職會東山寇作張命討賊請得便宜從事許之間需兵幾何日前守蒲圻數人足矣先是大冶賊黃金龍亡匿劉君孚家君孚素黠猾收召亡命亦間爲官吏擒盜賊嘗隸岐亭役至是得三桂僞劄與金龍潛結周鐵爪等期七日起事事泄君孚恐遂以五月反於曹家河官兵爲所敗成龍行次陽邏偵知君孚雖反衆未合遂直趨賊寨未至十里止宿榜示脅從者許自首免罪過三日以從逆論投首口千人賊

勢孤欲卽降懼誅成龍遣一人持檄往諭而自騎一羸一人張蓋一人鳴鉦前導命行呼太守來救爾山中人君孚匿後山夾道伏槍弩數百因疾驅抵賊舍坐聽事賊衆環列問老奴安在君孚舊隸麾下故呼以暱易之又問山中雨水禾稼若何若良民何爲作賊取屠戮時方酷熱若父母妻子匿何所得母苦耶賊皆羅拜泣公曰熱甚須少憩遂熟睡鼾聲如雷移時寤又謾罵君孚老奴何爲久不至客至乃不設酒脯君孚初懼見給及是出叩頭受撫卽日降其衆數千問金龍安在曰在望花山卽令導行掩其不備擒斬之捷聞八月復職調黃州甫抵任湖北大亂何士榮反永甯縣陳鼎業反陽邏周鐵爪鮑世庸反白水劉啓業反石陂各擁衆數千號十萬逼趨黃州時援軍皆赴湖南黃州吏民才數百至不能

備閘柝或議退保麻城成龍口黃州七郡咽喉也棄之則荆
岳瓦解矣吾誓死不去然坐守亦非策當勦之賊雖衆皆取
士榮進止先破士榮餘可不降下遂集鄉兵得二千人別遣
黃岡知縣李繼政擒鼎業士榮已據黃土坳遣把總羅登雲
武舉張尙聖迎擊前鋒戰少卻成龍疾馳抵尙聖營日午鄉
兵大集有衆五千屯箔金寨與賊對壘詰旦士榮率賊數萬
分東西路來攻東路賊少登雲領千人禦之而自率千總李
茂昇當其西尙聖攻右把總吳之蘭攻左戰始合之蘭中礮
死賊鬪益急火燎及鬚或勸少避叱之曰今吾死日也敢言
退者斬遂鞭馬直前回顧茂昇曰我死可歸報張公茂昇急
發矢殲其大旗軍隨進茂昇馬被槍棄馬射殺二人易馬進
戰復手刃數人而尙聖自右山繞出賊後夾擊賊大敗斬賊

數千士榮左臂斷就擒登雲擊東路亦追奔數十里得賊名籍立焚之乘勝至呂王城衆欲少憩成龍曰破竹之勢不可失也方炊覆釜以進據鞍草檄諭有能擒賊獻者重賞投誠者待以不死脅從歸者但閉門坐家無軍器卽從賊概不追問藏兵仗者卽良民亦誅死於是賊衆聞士榮擒名籍已燬各解散至白水阪鐵爪世榮等欲趨保石子寨已遣人守隘不得上悉擒之又分賊平石陂賊卽勒石岐亭班師自誓師至此二十有四日以鄉民數千破賊數萬不費公家絲粟黃州平時康熙十有三年十一月也次年秋大饑發廩賑卹全活數萬人十五年水旱災訛言復起成龍故示暇豫修赤壁亭榭日與寮吏獻詠飲射其間民皆曰我公如此復何憂會丁繼母艱士民乞留者數萬有

詔奪情視事十六年總督蔡毓榮等奏復設江防道就任之
明年遷福建按察使民遮送至九江凡數萬人哭聲與江湖
相亂十八年春抵閩時耿精忠亂後康親王駐軍省會閩民
多以通海獲罪力白王言諸案所牽引多平民宜省釋覆錄
時大吏有難色因指庭前婦孺曰此曹豈能反皇天在上獨
不爲方寸地也王久聞其名至是益重之悉從其請巡撫吳
興祚薦廉能第一遷布政使禁軍月徵莖夫數萬爭於王前
罷之滿兵掠浙東子女役爲奴者數萬贖歸之各屬納賦皆
應時收不增銖黍署中新米不給至無衣可典日或不再食
隨征滿漢大臣朝使者有時來過徑入臥內或繞署周行几
案間蛛絲鼠跡文卷書冊外無長物咸歎曰于公清苦天下
一人而已外番貢舶有所獻悉屏之或呈樣香一嗅卽持去

貢使齎指作禮曰

天朝有此清官吾儕所未聞見也十九年遷直隸巡撫疏請
豁免宣府所屬東西二城及懷安蔚州二衛水衝沙壓荒糧
三千餘石銀千餘兩從之又因災疏請緩征並平糶

詔卽以平糶之米作賑會旱步禱雨立沛禾黍重歧三穗民
號曰千公穗尋劾青縣令趙履謙貪黷狀按治如律二十年
春

陞見

賜坐

賜茶

面諭曰爾爲今時清官第一朕所深知因問勦撫黃州土賊
時事又問屬吏中亦有清廉者否公以知縣謝錫衮同知何

如玉羅京對

上曰爾所劾趙履謙甚當公奏履謙過而不改臣不得已劾之
上曰爲政當知大體小聰小察不足爲且人貴始終一節其勉
旃旋

賜食

御書房又

賜帑金千良馬一馬

上所乘也越數日

御製詩手書賜之尋遣官助賑宣府各屬饑

詔蠲免本年額征及積年帶征秋請緩真定府屬房稅銀又
請破格全蠲霸州本年田賦均報可冬乞假歸葬

優詔許之未幾調兩江總督瀕行舉直隸守道董秉忠通州

知州于成龍南路通判陳大棟柏鄉知縣邵嗣堯阜城知縣
王燮高陽知縣孫宏業霸州州判衛濟賢並堪大用得

旨俞行抵江南官吏皆望風改操知成龍好微行遇白鬚偉
貌者羣相指目懾檄郡縣條上便宜皆爲興舉會江甯知府
闕

詔卽以通州牧于成龍擢補成龍漢軍人由蔭生起家後官
河道總督諡襄勤者也南中風俗侈麗至是人爭衣布褐布
價驟騁士民有歡笑無管弦游情不空手櫃坊無鎖自治官
書夜中旦不寐性喜飲至是累月不一醉嘗中夜苦飢索少
米作糜不得笑而止時苞苴盡絕午日遣視察吏無敢以角
黍相遺者建虹橋書院擇高才生講習其中親往訓課副都
御史馬世濟還自江南劾其年衰爲中軍田萬侯所欺蔽部

議奪萬侯職成龍休致

持詔留任二十三年春巡海還兼攝江蘇安徽兩巡撫事四月十八日疾作召屬吏與訣端坐逝至夜漏盡坐不歆顏色如生年六十有八自服官後未嘗攜家屬入署及是將軍都統暨寮吏入其寢室見周身布被袍一襲韉帶各一堂後瓦甕米數斛鹽豉數盎而已訃聞

賜祭葬

予諡清端七月學士錫住勘海疆還

上詢及在官時聲績錫住奏其清廉但因輕信或爲屬僚欺罔上曰此與成龍不合者造爲此言耳居官如成龍者有幾十一月

南巡至江甯

諭知府于成龍曰爾務法前總督于成龍正直潔清乃爲不
負又

諭閣臣曰原任總督于成龍朕博採輿評咸稱爲古今第一
廉吏可加贈太子太保蔭一子入監會

御試詞臣作理學眞僞論納卷時

上特諭曰理學無取空言如于成龍不言理學而服官至廉斯
卽理學之眞者也卒後軍民爭繪像祀江甯蘇州及黃州皆
有祠

御書高行清粹四字爲祠額并書楹聯賜之成龍軀幹修偉
紅頰隆準美髭髯精神炯炯四映與人交不擇貴賤談燕終
日一語涉私卽正色斥詰每曰上帝臨汝又曰日監在茲屬
吏畏威若負霜雪及論事輒齎顏商權用此雖嚴憚愈益親

樂之年饑屑糠糲米爲粥與僮僕共之屬吏至亦以是進曰
如法行之可得留餘以賑也性強毅而臨事應變無方用兵
如神尤善治盜所用游徼及降盜恒撫以恩威輒先來報知
武昌時營弁某弟素無賴適遣歸是夜餉被劫弁告弟所爲
已誣服獄具破械縱之巡撫驚問曰盜寃眞盜何在卽指堂
下一校曰是真盜也餘黨進香木蘭山今晚獲矣尋獲盜賊
尙在校家封識宛然江甯盜號魚壳者拳捷倚駐防都統爲
解有司莫能擒成龍抵任官吏遣迎日旰不至方驚疑間則
已單車入府矣羣吏飾廚傳饋餼率皆不受按察使某年家
子也請具一餐爲雅壽笑曰以他物壽我不如以魚壳壽我
按察使喻意出乃以千金購名捕縛置獄是夕成龍秉燭坐
一男子持匕首自屋梁下叱何人曰魚壳也卽解冠几上指

其頭曰取壳長跪笑曰取公頭不待公命也方下梁時如有物擊我手不得舉乃知公神人某惡貫盈矣自反接銜七首以獻成龍曰國法有市曹在遲所獄吏報失盜人情洵洵而已命中軍將魚亮斬決西市孫準別有傳

張璿字伯珩陽城人幼聰敏十五歲爲弟子員十九登壬午鄉試聯捷癸未進士授原武知縣邑初隸版圖數值兵燹招撫流亡墾荒緩征嚴保甲興學校戢盜安民加意綏輯申開河口裁汰冗役其年同考得十二人後成進士者八屢經薦剡以卓異徵爲御史百姓遮道擁留立碑建祠己丑按四川時版圖所八止保順二府鼓勵將士漸次開闢諭吏以潔已愛民勅將以束兵守律請撥牛種五萬散給兵民本年奏報接應軍需外貯粟六千八百有奇辛卯再巡淮鹽革積弊嚴

絕請謁夾帶私販皆親行盤查抽掣引鹽計十三萬又完正課帶徵逋額溢二十三萬臺省交薦晉大理寺丞轉順天府丞歷大理寺卿工部右侍郎巡撫陝西秦當破傷災殄之餘又值軍興煩費之曰綜理緩急悉合機宜表率文武正直廉明秦人戴之如父母辛丑調福建督糧道去之日百姓輒輟郊原頂香揮淚祖帳壺漿幾百里祀名宦抵閩通商賈禁侵漁塞漏卮革羨耗蓄儲饒裕拮据二載以積勞卒於官年四十有二康熙六年提學道博采輿論追崇名宦歲享祭祀毛一身字香林鳳臺人順治丙戌進士性廉潔能耐艱苦官戶曹監淮安倉有羨額隨空運通州收軍草數百萬束輒藉草以居

世祖東巡

賜裘帽以榮之尋以京察上考遷郎中督餉固原官銜至輒給軍士不少利秒忽有

旨毛一身清官第一加三級並

賜額以旌遷興安參議道佐平李來亨功最會州有火患泣下成疾卒卒之日至無以爲歛

李棠馥字子棻高平人丙戌進士授刑部河南司主事歷四川司員外郎遷郎中精研律意而本以寬恕尙書党公亟稱之己丑

詔郎署著聲望者考授直省督學道得湖南參議先是爲員外時同考戊子順天鄉試所拔多名宿及抵楚能以經術佐風藻楚士翕然庚寅艱歸服除補湖廣荆西道時西山遺孽未靖

禁旅經過議雜處民間力持不可往復爭論卒令營於郊外
遷陝西驛鹽道副使驛故難支大兵進取三山隣邑協餼又
不以時至疏請如協額數從本邑解項兌支而以他邑協者
解司庫諸驛獲蘇丙申遷督糧道左參政尋遷四川按察使
在蜀一年超遷兵部右侍郎

世祖召見慰問之奏對詳覈庚子甄別卿貳得

旨褒諭才品與職任相宜踰年以疾請告歸丁未奉例入京
補戶部右侍郎總督倉場復改兵部右侍郎未幾具疏自陳
以年老致仕旣歸徜徉棗谷中展閱經史甲寅輸家糧一千
石上佐軍餉比平手書屬子猶以未報

國恩爲恨云

田六善字兼三陽城人少孤苦讀書不少輟乙酉丙戌聯雋

進士知太康縣以治行入爲戶部廣東司主事權臨清關監
鳳陽倉兼臨淮關罷濫征革奇羨歷員外郎廣東司郎中遷
授江南道監察御史疏請弛馬禁獲

允又請勸清吏以養百姓勸督撫以養清吏尋掌江南道巡
視長蘆鹽政康熙元年假歸甲辰補貴州道歷掌陝西廣東
道疏稱吏部條例日繁曰吏部用人行政有偶出意見實係
過誤者奉

旨皆循爲例是意見可以再行過誤可以再舉也例旣無所
不有弊故無不可爲意欲如此卽有此例意欲如彼卽有彼
例請除請

旨欽定條陳準行外餘不得槩引爲例

上甚是之又有再選裁兵暨留任之弊督撫止參衰老微官

諸疏付詳議爲多巡視京通二倉勾稽精覈還掌山東道內
升歸曰讀歷代史會

詔內升者仍補科道遂以正四品服俸管刑科給事中事疏
陳滿洲皆勞苦功高之人請除反叛外一准於律無得株連
又陳急停報盜之令總計緝盜之功而

聖學宜先讀史疏曰祈

諭曰講諸臣通鑑與經書並進仍令不許忌諱其言尤偉尋
掌戶科印補光祿寺少卿遷通政司右參議甲寅擢都察院
左僉都御史值滇閩倡亂時條上勦討大計而置重兵建昌
衢州扼固原糧道嚴山西河汎鼓勵綠旗官兵敕給爵賞諸
疏尤中機宜胥得

旨允行又請嚴禁首告叛犯楊起隆之誣累遷順天府府尹

會發帑銀買米京城米騰踊抗章請罷民德之又擢左副都御史尋擢工部左侍郎應

詔陳言曰推布政仍宜於按察中挨次求之推按察仍宜於參政中挨次求之而知縣捐納先用卽用是明以困窮之民爲償債之地也又請復差巡按曰道府州縣規禮非遣巡方終不能革祈出其不意以示不測戊午調戶部右侍郎督理錢法奉使閱視河工還

慰勞有加旋轉左侍郎以老請致仕歸後十年卒六善嘗贊魏敏果臺綱舉于清端撫保定著鷓棲幔坡集拾瑤錄子淮舉人刑部主事

張爾素字賁園陽城人丙戌進士選庶吉士補祕書院編修已丑同考所得皆名流擢左春坊左諭德出爲江南參政廉

潔自矢纖塵不染士民立碑頌之遷陝西按察使乙未升湖廣右布政使時大兵征黔滇協理糧餉籌畫周詳公餘立書院羅三楚名士談經課藝士風丕變丙申復入爲通政司使尋升刑部右侍郎父病請歸養丁外艱服闋起原職尋丁內艱丙申擢本部左侍郎會求直言引禮經大法小廉之義疏論十三省巡撫爲天下傳誦辛亥引年乞歸以原官致仕年六十三無病卒

勅賜祭葬

梁肯堂字掖呂澤州人丙戌進士任山東掖縣知縣明敏有爲人不敢以私干剖判刑獄片語立決邑多逋賦催科有法不爲厲民整飭學校風化大行一時科第蔚起民歌詠之以誌德政張中丞忻爲作序沒後崇祀鄉賢

王紀字子魯沁水人辛卯壬辰聯捷進士選翰林院庶吉士授禮科給事中議論侃侃不避權勢出爲分守陝西隴右道參議以卓異

賜蟒衣一襲遷江南蘇松兵備副使一年遷分守山東濟南道參政在江南設伏平湖寇唐四之亂完納覆嘉定逋負之罪山東辨紳士扳扯之冤人皆尸祝之乞終養歸尋以薦軍前任用卒年五十有二

田逢吉字凝只高平人乙未進士選翰林院庶吉士授編修累官內國史院學士終浙江巡撫逢吉年五歲父馭遠爲盜賊所執以刃脅之號泣父旁若請代狀賊感動得無害在翰林戊戌分校庚戌主試所拔取士如孝感安溪遂甯太倉崑山卽墨武進猗氏平湖諸公後胥爲當世名臣任學士日或

議出穀貸民秋成後少收其息逢吉日此與青苗法何異事
獲寢嘗奉使賑淮陽奏請寬逃人禁使流移者獲隨地收養
全活無算及巡撫浙江適耿逆亂李制府之芳督師金衢逢
吉留會城治軍務早夜不少休久之以勞成疾請告去然自
以受

國厚恩未獲親致殄滅爲恨云

楊榮蔭字半嶠陽城人進士有詩才順治十七年知桂林府
多惠政艱去康熙七年復知平樂府人不敢干以私奸猾多
羅織搖撼肆吞噬或至鋌而走險榮蔭廉得其情蔓詞槩不
准獄幾空庾戌春疫出貲治之活者數萬人三椎關稅正額
外銖黍不妄取修學宮治府署繕城垣粵西人號循吏焉
陳廷敬字子端一字說巖澤州人九世祖居陽城郭峪村少

警慧九歲賦牡丹截句曰要使物皆春人胥異焉舉丁酉鄉試戊戌成進士選翰林院庶吉士初名敬榜有同姓名者

世祖特命加廷字以別之辛丑

聖祖嗣位授內祕書院檢討康熙壬寅假歸越四載赴

闕已酉擢國子監司業庚戌遷宏文院侍讀辛亥復設翰林院改侍講轉侍讀尋擢侍講學士壬子充

日講起居注官癸丑轉侍讀學士乙卯擢詹事府詹事兼翰林院侍讀學士

命祭北鎮著北鎮集丙辰遷內閣學士兼禮部侍郎充

經筵講官丁巳改翰林院掌院學士教習庶吉士廷敬雅嗜讀書撫膺經史

講幄初開首膺

特簡日進講

宏德殿中敷演詳剴析義在文句之外嘗薦戶部郎中王士禎詩學戊午正月

遣侍衛傳召

命偕士禎召以詩進

上覽廷敬石榴子詩曰風霜歷後含苞實只有丹心老不迷誦之至再玉音琅然翼日擢士禎爲翰林院侍讀閏三月命偕士禎日直南書房廷敬自

宏德殿講訖卽入南書房內直廬以爲常旋

詔舉博學鴻儒復疏薦戶部主事汪琬亦尋入翰林十一月母喪

遣內閣翰林二學士齎茶酒慰問母張以廷敬任詹事時

封淑人舊亡賜祭葬例又准以學士

賜卹胥異數也辛酉十月補翰林院掌院學士講官如故
命撰朝會燕饗樂章凡十有四篇癸亥擢禮部右侍郎兼翰林院學士尋轉左

太宗

世祖聖訓總裁缺復以

命廷敬學士遷它官仍典書局自廷敬始甲子遷吏部左侍郎兼管右侍郎事仍兼翰林院學士舊制吏部兩侍郎一兼學士時左侍郎張士甄業兼銜

特命兩侍郎並之戶部右侍郎舊理錢法又

特命廷敬督理肥梳積弊錢法一清九月擢都察院掌院事
左都御史仍理錢法時議廢兵屯外城緝盜賊御史李時謙

言其非便廷敬申時謙指事遂寢嘗以奢儉爲貪廉根柢請
定官員士庶冠服衣裘飾用之制婚喪之禮又請嚴考試親
民官嚴督撫責成議水旱報免法而特疏劾雲南巡撫虧餉
至九十餘萬兩外臺肅然丙寅九月遷工部尙書丁卯二月
轉戶部九月又轉吏部會楚撫事起有欲以姻連鈞致事端
者亡左驗而廷敬請引退

命以吏部銜解任仍管理修書總裁四日一至內直庚午二
月

特旨補左都御史兼內直書局疏言科道當切實指陳無毛
舉細故剔摘成例而進言貴簡明無冗詞多而論事少知靈
壽縣陸隴其知清苑縣邵嗣堯胥有政聲薦其廉後胥握御
史七月復遷工部尙書辛未六月調刑部秦撫請叛黨子弟

山西通志卷一百三十一 職官金一
妻三人從遣部議發烏喇獨議律無緣坐或言軍流徒杖無
得稽延以煥熱審時帖業行追毀之督捕咨辟逃人某獨議
某非發烏喇後再逃者爭良久乃定鞭責給主壬申父喪慰
問

予祭葬有加禮甲戌十月卽家起補戶部尙書是時服闋甫
七日也十二月至

闕時

召入內直戊寅冬長直

內廷已卯十月轉吏部戒選人無得謁見又戒司屬曰當駁
必先呈稿無得臨選駁一人由是駁者差愬舉人補中書缺
請欲就知縣教職者聽揀選例當部試疏言中式有榜名奚
用試請序憲綱直省而前後又以勝名爲序考官例當檢舉

冒籍言考官罪在不公明冒籍非其罪也請罷之胥

允行壬午三月桐城張文端公英致仕

命總理南書房事自是部務畢輒入直以爲常廷敬常獲
賜御書點翰堂額時又

賜清立堂額博文約禮四大字癸未四月

命爲文淵閣大學士兼吏部尙書故事大臣入內閣不復侍
經筵兼之者桐城澤州二相也廷敬性尤慎密凡造膝面對
暨中官轉達語未嘗少泄乙酉

南巡閱河丁亥復

南巡閱溜淮套胥扈從庚寅十一月力請謝事奉

旨卿才品優長文學素裕久侍講幄積有勤勞自簡任機務
以來恪慎益著倚毗方殷覽奏以衰老乞罷情詞懇切著以

原官致仕

賜御書午亭山村扁額又

賜御書宋韓魏公琦詩春歸喬木濃陰茂秋到黃花晚節香
聯時編輯

御製文集蒺藜繕寫乃行辛卯五月會丹徒張文正公玉書
薨於熱河邸舍

特命暫理閣務廷敬不請俸章奏必書

予告於銜是冬復直

內廷壬辰三月疾

遣內侍內大臣內直諸臣往來閱問四月十九日卒於寢

賜紫杉閱器一具賻銀千兩

特遣皇子臨奠滿漢九卿胥集又

賜御製輓詩

予祭奠加祭一筵

賜謚文貞令行人護喪回里廷敬始終職文翰由詞臣陟宰
輔

修明史爲總裁官鑑古集覽古文淵鑑佩文韻府方輿路程
字典諸書胥

命裁定焉亟典文衡同考辛丑會試總裁壬戌辛未癸未會
試前後得士如馬世俊金德嘉張瑗王式丹輩胥極一時選
又總裁癸丑武會試充文武

殿試讀卷官七至

賜字賜書賜服器宴饌不勝書所著尊聞堂集八十卷晚年
手定爲五十卷曰午亭文編又午亭歸去集二卷午亭者陳

氏陽城別業綠水經注沁水流逕午壁而名所謂午亭山村也又嘗承

賜筵

御製詩擬諸姚房李杜序曰朕覽皇清文頴大學士陳廷敬各體詩清雅醇厚非積字累句之學所能窺者故作詩以表風度其被

褒嘉若此子謙吉邠睢靈壁河務同知豫朋甲戌進士庶吉士壯履丁丑進士

日講起居注官侍讀學士

內廷供奉復爲編修

段藻字瀚平澤州人順治己亥進士初授河南開封府推官改任晉甯知縣兼攝惠來旗閩告變潮鎮劉進忠反陷旁縣

兩以兵攻普甯藻悉力固守屢有斬獲料賊必大至僞約降以緩其計乃密請尙藩赴援親率民兵前鋒陷陣賊大敗兩城獲全升監軍道兼理事廳統攝歸善駐惠州會劉復率羣賊壓境當戰不利城陷被執脅之降藻目炬髮指矢死自誓賊亦不敢害時尙藩方與議和釋以歸劉復中變遣紅衣二賊率衆邀於途而尙藩大兵適至迎與戰大破其衆事平上其功

賜以忠貞可嘉額授嶺東道參議以疾乞身卒於家崇祀名宦鄉賢季子萬鋌監生有武略隨其父多立戰功云

穆生輝字榮之其先臨縣人以軍籍隸天城衛生輝少驍勇有智略奮迹戎行順治初以克復朔州功授大同鎮左營參將從征江西轉戰楚越間所向無敵積功至副將蔭拖沙哈

上正統元年 卷一百三十一 雜錄 三十一
喇番十一年遷鄖襄總兵在鎮五年嚴江防練軍伍鄰寇不敢犯內擢鑾儀衛使鄖陽士民號泣攀留明年復來鎮民間之額手相慶歌舞之聲徹數十里其繫人心如此康熙三年武昌有變督兵討之驟遇伏爲賊所乘率麾下殊死鬪矢盡援絕大呼陷陣子朝佐襲職官至汾州參將

霍之琯字蒼壁馬邑人御史瑛孫也幼孤遭闖寇之亂家門中落與祖母陸相依爲命拮据於兵戈患難者幾二十年

國朝順治甲午舉於鄉戊戌成進士授柳州推官改知范縣節用愛人內遷之日范民攀號祖送在中書四年以病乞歸日惟閉門讀史焚香彈琴性恥干利而樂善好施邑叠遭凶荒累次出粟減價平糶傾囊振恤癸亥地震城崩復捐金補築之歿之日里中莫不相向流涕刻石志德

以上各府屬

吳道默字希聲沁州人少喜讀家貧無師溺苦力學爲諸生有聲庠序鄉里子弟從而受業者數十百人明季流寇肆虐河東西之境戰爭幾無虛日道默扶老攜幼遷轉山谷中所至挾書以行稍憩則爲人講說性命之理顛沛不違子璵年十八舉於鄉誠之曰少年登科一不幸吾茲未敢遽以爲喜及璵成進士厯官中外時暇手書勉之以清謹忠勤璵受教惟謹卒爲名臣循序當貢太學以身膺封典讓其次已者卒年七十有四崇祀鄉賢

宋之弼字鼎鉉沁源人歲貢任蒲州訓導崇禎十七年流賊李自成陷蒲州之弼伐鼓集諸生於明倫堂北向再拜引佩刀刺胸創甚諸生環抱泣救從間道扶回原籍隱居不仕晚年好易樂爲後輩講學自號山木老人年九十八卒

趙天麒字平符武鄉人幼穎悟數歲能書大字人稱神童年十一爲諸生直指王拔冠晉省崇禎壬午以五經舉於鄉明年成進士時流寇犯豫嘗召對天麒陳戰守八策胥中機宜將官之禁近以親老辭甲申闖賊遣其黨來聘天麒焚冠服投深崖下以衣挂樹得不死

國初直指黃以遺佚薦姜逆之亂授僞官不從劫其家亦不爲動母尋卒廬墓三年服闋當路交章薦天麒以父春秋高力請終養因築笑樸園種樹織麻以其力供父比父卒遂不食旣斂瞑目不復言已而語其子曰我死必與爾祖同日葬瓦棺紙衣使後世知爲處士墓足矣遂卒著理學真詮北原山房稿續高士傳四書正一傳諸書行於世

張純修字正一沁州人孝子張化之孫也生有至性髫齡喪

母哭泣擗踊痛不欲生父慰之始勉進食父尋遽疾醫者束手純修禱於神夜夢有語以當服某方者試之果愈後父兩娶事之惟謹年十九補諸生姜壤之亂偕家人避賊山中叔進圖爲賊逐墜崖下幾死純修負至山谷間竭力調護叔雖生而肢體殘廢養之終身與弟純養友愛備至教授生徒從之遊者皆循謹有法度年八十二卒屬纊時猶手書安分守己字示子孫公舉鄉賢入祠

吳璵字伯美沁州人順治十六年進士知河南確山縣邑遭明季流寇殘破璵招徠戶口墾田歲日益以方略捕獲盜魁戴騰宇杖殺之大軍征雲南邑當孔道輿馬糧餉先事嚴辦而民不煩康熙十三年以卓異入爲吏部主事歷遷郎中十六年遷鴻臚少卿尋轉光祿少卿通政司右參議魏敏果公

象樞亟稱其賢二十年

特擢右通政二十一年任太僕卿越三月擢左副都御史請復

勅督撫巡方疏曰令甲督撫于

命下之日卽杜門謝客蒞任守令不得參謁上官凡有舉劾不過據道府揭報及胥吏訪聞愛憎毀譽眞僞相亂督撫無由知革火耗而火耗愈甚禁私派而私派愈增請

勅直省督撫親歷各屬以知守令賢否或謂巡方恐勞擾百姓夫督撫賢則必能禁送迎卻供應如其不肖雖端坐會城而慕夜之饋踵至矣豈獨巡行足以勞民哉又疏曰巡撫及巡守道無一旅之衛而提鎮各建高牙前日撫臣如馬雄鎮道臣如啓泰雖懷忠秉義空拳莫施向使各有兵馬奚至束

手宜及此時復舊制使巡撫巡守道仍各管兵馬減提督增總兵分一鎮爲數鎮以聽督撫節制則無尾大不掉之患矣二十八年除兵部右侍郎尋

命巡撫湖北湖北自裁兵之變黠猾率指仇人爲賊黨株連不已瑣憾不究訊懲其妄訐者人心大定淬勵所屬郡縣俾爲良吏怙終則糾繩無少貸陝西饑流民入湖北令有司分賑全活數萬人三十一年

上念陝西西安雨水不調襄陽地近西安

命截留湖北漕米十萬石貯荊州備賑旣而

命以荊州兵船載運至襄陽璵與糧道王道熙議以兵船灣泊大江必由漢口溯流西上方抵襄陽計程二千餘里今原運漕船將次撤回莫若乘夏水令原船順道運赴襄陽僅七

百餘里卽以便宜行具奏

上嘉之八月以內憂去任賻贈一無所受曰非吾母志也三十三年

上以瑛有守有才

特用爲湖廣總督三十四年奉

旨酌裁湖廣額兵瑛區畫得宜人情帖然武岡州牧任三益激民變立捕其爲首者置之法而劾罷州牧故事土司見州縣吏不敢抗禮後大吏稍稍優遇之漸以陵夷瑛至絕饋遺飭謁見長吏如故事無敢肆者奏增湖廣鄉試解額

上命並增各省解額三十五年升左都御史旣視事自戒曰昔賢有言司風紀者當養人廉恥不專以彈劾爲能吾謬掌臺端要在正已率屬其可見事風生以褻憲體乎三十六年典

會試是歲五月

上北征回鑾顧迎

駕諸臣褒左都御史吳璵及河道總督張鵬翮居官之廉翼
日又

諭諸臣曰吳璵居官卽爲所參劾之人亦以清官好官稱之
百姓尤深感服閱數口以爲刑部尙書而以張爲左都御史
三十七年進保和殿大學士兼刑部尙書璵熟於朝廷故事
中外章奏可否見輒洞然其有往事可援據者雖久而不忘
奏對皆竭忱悃

上每稱善所薦引皆廉能更三十九年會試以右臂偏枯引疾
特命爲總裁官六月

御書風度端凝額賜之四十一年具疏乞休同官代奏請

上曰吳璵爲人誠實豈可聽之去嘗以

御臨米芾千字文賜之題其後曰吳璵寬厚和平持已清廉
先任封疆軍民受其實惠朝中之事面折廷爭必得其正朕
甚重之故書於後以紀其能得人臣之體四十四年卒於位
自居政府室無妾媵口不言清每語任外吏者曰地有遠邇
俗有良僇然愛財惜命民情則一也能體此念自爲良吏矣
遺疏入

上遣重臣奠茶酒

于祭葬如典禮謚文端所司奏大學士缺

上以典喪未歸懸缺弗補

諭曰朕心殊不忍也翰林院進所撰祭文

諭曰大學士吳璵賢行甚多勅改撰其文有曰潔已奉公正

身率屬總憲綱而丰裁卓立掌邦禁而讞獄持平慎以居躬
清能容物其知之也深矣初沁州薦饑糴米賑之全活甚衆
有司議增沁糧一千三百兩立爭改正沁人德之立祠以祀
雍正十年

詔入祀賢良祠子四長時謙別有傳

趙曰燝樂平人順治初以進士知博野縣入爲刑部主事累
遷江南驛鹽道以終養歸曰燝孝謹而雅饒才略遇盤錯應
之裕如博野巖邑盜時出沒被獲者株累多至數十人曰燝
設科條洞中機宜盜遠引乃案株累者悉縱之期月盜靖獄
空在江南疏通鹽法勒傳政一書俾運快二丁無互爲詭抗
以至廢閣公務攝頴道歲饑賑補有紀民無流殍泣任六載
騰薦剡者七而曰燝累牘陳情以禮致政焉

趙宏化字亮弼壽陽人領丁酉鄉薦戊戌成進士康熙六年選密雲知縣地邇京師旗兵驕縱令長率優容莫敢問一日逢宏化出行不下馬擒而笞之其首且至堂謾罵復笞之卽詣大吏自効大吏以聞

上賜以鞭二自是所在肅然無敢犯者王子充順天同考官得韓文懿公葵及裘充美諸名士初韓以諸生註誤被斥不試場屋者有年是歲入北闈卷分某房已擯落矣宏化偶檢得驚歎以爲近世罕有借而薦之獲列上第尋連得會狀文章蔚然爲一代宗宏化亦緣此獲知名藝苑在密雲多惠政及去密人爲祠祀之再任如皋知縣卒於官後韓奉

命撫陝道經壽陽訪其家謁遺像而贊之有曰百口奚恤一介不取又曰哭先生之像知先生之心蓋欽其廉者至矣非

徒知已之感云

亢得時崞縣人隸漢軍旗少穎悟年十二爲博士弟子會
大兵南下以俘繫走千里幾死者數未嘗一日忘讀已乃教
授瀋陽人稱山西夫子順治元年從入關除國史院學士尋
命巡撫河南節省河工煩費累萬率各屬招撫流亡給以耕
具奏免荒糧亟舒民困十五年晉兵部尙書總督漕運禁包
攬代納之弊權緩急度支之宜綱紀嚴肅遠近翕然明年七
月海寇犯江甯得時聞變自高郵出師馳拒之賊水陸並進
勢不支得時曰爲國重臣不能減此朝食安得覩顏偷息以
爲國恥乃向

闕九叩星拱水死遺疏陳狀給卹典蔭其子承恩內院讀書
馮右京字左之代州人父亨期鎮江府經歷家居值姜瓖之

變有守城功右京中順治四年進士由翰林授御史巡視漕
運革陋規禁差擾力除代運盜賣諸弊疏劾戶部尙書某貪
縱直聲震朝右爲山東巡按陳恤民四疏如請查荒田協濟
驛遞整頓漕糧皆當時要務也巨寇周魁軒轉掠十餘郡將
攻長清右京命將出不意擊斬之并擒夥賊焦二青王俊等
餘黨悉平康熙初授湖廣荊西道楚故澤國潛沔景陵間水
患尤劇右京相地形穿渠三百里以殺水勢民慶安瀾建懷
德碑以紀其事居三年以疾歸卒

張允中崞縣人已亥進士任河南襄城縣值地方凋瘵允中
悉力體養輕徭寬賦招撫流亡月朔集諸生課試並爲教條
以盡勸導歲旱蝗允中虔禱備致靈應襄民感之刊布青天
德政詞五十則以爲頌擢吏部主事卒祀襄城名宦

閻士樟字大木五臺人幼喪母鞠於舅氏遂從鄭姓以貢生選直隸交河縣時滿漢官兵南征居民多逃亡士樟至招徠安集流亡皆復業親王統大兵南下鄰邑設飲饌甚豐士樟持一蒼鷹攜一瓶酒詣王曰交民貧供張不備罪在邑令王嘉之賜坐設食賞資甚渥居未一年撫按薦章列第一將行取入臺垣適丁舅父鄭憂去職先是鄭病且危有客勸令歸宗可不誤升途士樟曰見利忘義人其謂我何卒以遭憂報服闋選補德興令時盜賊滿山谷城池無守禦具士樟至并巡柝屏去忽一日召鄉夫修城猝至一家曰圍此室擒賊則衙快李某家也縛其魁密室中得刀銃數百事大將軍印一枚解赴江撫撫大喜馳疏入奏匿不言士樟功士樟亦不列其後有捕盜至者輒給牛種令歸耕由是盜悉化爲民終

士樟任無盜警尋復丁舅母憂康熙戊戌選補江西永甯令始復姓閩永甯有積荒地千餘頃歉課至萬餘金官民交困士樟涕泣請於巡撫具疏豁免舊額課萬石減至三千石民出水火喜若更生流亡復業百廢漸舉居無何忽部議前任造冊遲延誤呈吏議巡撫將爲辨復自以數奇屢挫不欲復仕入粵謀措資北遽遭疾卒於南雄士樟少負幹濟才當順治五年大同總兵姜壤反代人劉遷聚衆應之據五臺之寶村爲巢穴五臺土匪亦蠭起賊聞士樟名欲脅使從逆士樟潛送妻王氏於母家山中獨夜半入城與邑令吳琮畫守禦策賊數萬圍攻不能破王氏至母家賊聚衆攻其堡寨寨將破王氏罵賊從寨壁一躍而下冒雜樹藤蔓上得不死人以爲神護云子襄以文學知名別有傳

王之翰字瀛字五臺人明季嘗以貢授禹城知縣遇亂棄官歸

國初姜瓖之變土寇蠭起之翰閤門靜坐無犯之者寇平招集流亡教之墾種瘠土皆爲膏壤遇歲饑發粟振濟全活甚衆善泉五都生聚密如並其澤也鄉有構訟不決者諭以一二言羣拱手服不復更質於官嘗夜行遇盜審視知爲之翰羅拜散去其爲人所敬服若此卒祀鄉賢

姜宗呂字瑯璵保德州人明右都督名武子名武援開封血戰死於柳樹坡宗呂往求父尸不可得遂詣闕上書請卹於楊總督文岳所得父故衣招魂以斂又以父所得卹典不應法復詣闕陳請

國朝順治戊子舉於鄉己丑姜逆之變守備牛化麟應賊以

宗呂忠臣子爲州人推重列劔鉞階下逼宗呂至脅之降宗
呂斥以大義賊囁嚅不能出聲宗呂徐步去比賊平州人多
以從逆伏法獨宗呂得免己亥成進士授濰縣知縣未蒞任
卒人胥惜之子櫛字仲端幼穎敏績學工文舉康熙戊午鄉
試乙丑成進士知麻城縣入爲行人司行人遷戶科給事中
副己卯江南主考甫竣事內升鴻臚寺少卿提督浙江學政
歷擢都察院僉副尋遷工部侍郎轉吏部以病卒於官馳驛
歸葬當櫛之官麻城也甫下車定徵收法設庫書六人擇謹
寔者司稽察賦畢輸而無追呼擾定保甲法俾民罷去守堡
樓役守家而鄰右助之三年無盜警麻城俗奸僧多蝕行商
嚴治不少貸曰賈人亦吾人奈何令流離縣界耶在戶科疏
請核捐納清兵餉持議侃侃典試得方苞蔣錫震劉學洙潘

旂郁士超輩數十人胥有聲督泐學文尙清肅力矯醲肥之習間不足取額輒訪前代忠臣烈士裔足之涖湖州有以溫寶忠嫡孫聞者核再四曰愼無使溫體仁家冒得之涖處州有老諸生不克書訖卷者問之劉文成公後也准給頂杭織造放雅遇之淡如而敖嘗對

上曰一錢不要一情不聽蓋公好也

南巡

賜御書席靜匾癸未由僉憲擢副憲甫六日拜工部侍郎之命業得疾而右侍郎例稽察錢局檢點不少弛病增劇十月復攝刑部右侍郎事旋晉秩吏部其距卒亦甫六日也班行胥惜之

喬廷桂字芳一解州人少貧嗜學年十五登第

國朝丙戌選入翰林歷任文衡擢侍讀學士性恬素公事外
閉門索居不隨時尙外轉例補臬司遽引疾歸嘗酌定州爲
大學入庠廣額晚號拙守山人年八十二卒祀鄉賢

閻應徵字賓皇夏縣人邑庠生性至孝居喪三年未嘗見齒
遭寇變負親遺像流離不忍舍崇禎間出穀濟荒存活甚衆
祀鄉賢長子梅文章雄博次子霖孝弟克家並祀鄉賢

馬廸吉夏縣人前王午舉人

國初知鄧州修葺城池撫循戶口流民多復業流賊劉二虎
犯境衆數萬掩城廸吉誓死守城中殺牛畜爲食撤屋爲薪
人無異志賊計窮遁去以功升治中卒

相斗南安邑人前明舉人順治中授電白知縣慷慨有義氣
明末流寇起出家貲給城守城賴以完及作令請免越境夫

役歸里又爲地方陳利弊祀名宦鄉賢

蕭熙戴平陸人生員順治乙酉寇亂舉家逃難見父被圍驅救父已投井死熙戴號泣躍入井中衆驚歎共救不獲祀都城昭忠祠

李忱字恂九安邑人順治戊子拔貢吏事明敏授西安知縣詳請協解溫處軍需撥府支銷雨傷稼請蠲田租之半民鄭某爲盜所誣雜鄭衆人中令辨之盜茫然亟釋去而論盜如法舉卓異

賜袍領旌之遷鞏昌府同知擢金華知府節宴飲省刑罰閩逆之亂嚴守孤城四十五日夜營無一卒城無一兵卒獲保全以勞卒

楊原澄夏縣人順治己丑進士初授益都縣知縣升兵部主

事轉郎中補廣東僉事歷官勤慎以勞瘁卒原澄天性孝友接物平易祀鄉賢

張慎發夏縣人順治間以貢授廣東按察司知事升直隸邯鄲知縣興利易弊稱循良丁艱歸補南皮令兩月卒於官士民悼惜旅櫬過邯鄲縣人泣奠送櫬至家者甚多入邯鄲名宦祠本邑鄉賢祠

鄭輝夏縣人前庚午舉人順治間任通州道張雲標以子吟贈肇慶府推官並祀鄉賢事跡不詳

朱裴本名秉以榜訛裴因字小晉聞喜縣人少爲督學使袁臨侯所賞中順治乙酉鄉試第一丙戌成進士初授易州知州例改徽州註誤去官久之事白補禹州捕大盜張陽寘於死諸生余愛枉擢刑部員外郎尙書張秉貞奇其才會擇

部曹有聲望者試

太和殿奏對稱

旨授陝西道監察御史疏陳八款在臺十一年出按山東請發臨清倉米三十萬石以振饑民又巡陝西茶馬入巡五城直登聞鼓院累掌浙江京畿河南諸道管理京察大計軍政胥以風力著補禮科給事中疏請復詹事禁殉葬

命主考湖廣得吳甫生爲第一內升太僕寺少卿再遷太常寺卿會

詔舉博學宏詞舉洪洞范鄱鼎猗氏王含真又疏陳勦逆事宜胥獲

溫旨擢工部右侍郎監造

奉先殿充

殿試讀卷官轉戶部右侍郎時調度兵倉日昃多不暇食兼
管寶源局酌權開解銅法引疾歸家居凡二十年卒

孫錫齡字遵仰絳州人壬辰進士任宣府推官宣俗慄悍輕
犯法有手刃其嫂誣他人者廉得之抵以法又有緣逃人株
累者翼以賄免斥之曰枉安用賄不枉又安用賄按之果枉
徑釋之以卓異遷監察御史首請纂修孝經衍義而丁艱文
武官胥宜解任守制又請革行戶以除商害禁私派以蘇民
困巡陝西茶馬請中印烙之制巡長蘆鹽請蠲積欠以引配
鹽使豪強不得牟利尋掌河南道侍
經筵內升鴻臚寺少卿轉光祿寺再遷通政司左參議以胃
病乞休歸卒錫齡嘗迎族兄女於江南俾無至顛沛韓雨公
歿而業落妻至不能掩土亟賻以葬之

楊永甯字地一聞喜人父聯萬歷甲午舉人知甯州永甯六
歲喪父昆弟中年最少奉母瞿訓讀書不懈舉己卯鄉試順
治壬辰成進士選漢書庶吉士授宏文院檢討與修祀典諸
書擢國子監司業復積分法以課士戊戌爲會試同考官舊
制祭酒司業無典試分校者蓋異數也遷翰林院侍講學士
轉侍讀學士遷光祿寺卿奉

命祭告少昊帝堯陵暨閭里遷太常寺卿歷宗人府府丞擢
都察院左副都御史有處分闕吏治之大弭盜責清盜源諸
疏當時遽之擢兵部右侍郎轉左時宛平王文靖熙爲尙書
調發旁午嘗以永甯密爲規畫悉中肯綮而公議時若不欲
以材智先人亟稱之調吏部左侍郎甄流品錄年勞一日自
部歸談笑如常方潑墨作書遽擲筆不語移時卒

崔爾仰字子高聞喜人幼力學與兄爾瞻齊名戊戌成進士授晉州知州勸學墾荒治行著聞入爲吏部員外郎時懸賞格招閩越降人至者相屬爾仰嚴核符牒印劄得無濫遷戶部郎中開復諸生逋糧者五百四十餘人艱歸復補戶部典四川鄉試出爲浙江提學道僉事以勞邁疾強起竣事卒王鍾靈聞喜人戊戌進士選翰林院庶吉士授國史院檢討主湖廣癸卯鄉試請終養服除補原官累遷左右春坊中允再遷翰林院侍讀與修平逆方略

予告歸鍾靈性篤孝十一歲居母喪哀毀如成人繼母丁嚴厲鍾靈事之甚謹丁亦愛之盜嘗夜入室逼父母寢鍾靈亟起持長矛往格仆其一人羣盜攢刺中十餘槍幾斃得請家居捫舌循牆不敢少軼越而郡邑利病輒力言丁亥採買草

豆議令平陽輸大同鍾靈控免其役里人感之

甯世珽字光野聞喜人歲貢二翰子幼穎異十歲補博士弟子員攻苦不輟成戊戌進士授汾州府教授有河汾課士集遷鎮原縣知縣貸逋賦清驛站三年行取刑部主事遷員外郎斷決明敏

賜袍緞者凡三尋卒於官中外惜之

王懋官絳州人已亥進士授歸德府推官以疾歸懋官有膽識已丑庚寅間土寇竊發州同徐延議城守事城獲全及洩理刑案牘山積剖決如流胥吏無敢舞文者尤嗜商略文事二載以疾歸士民懷之

李珣霄字息六絳州人由拔貢官國史院撰文中書會敬謹親王以大將軍征湖南參贊軍前規畫多中機宜釋纍婦一

百三十人委署衡永郴道副使遷上荆南道將軍某率甲士來鎮抗言令駐城外五日內築營房八千有奇兵戢而民不擾遷江甯兵備道海寇內犯翀霄時署布政先檄守江浦令城中各杜門乃偕總制邵提督梁謀潛師長干伏白下龍江之間復出正兵夜斫賊營而自率吏卒搥金鼓賊驚起伏發踐殺殆盡遷四川按察使兵後株連繫獄者三百人力爲平反殲渠魁三人餘胥釋請革陝西茶馬累以蘇蜀民遷江西布政使鈐藩印簿二偕州縣各執其一執簿兌驗吏胥皆拱手後以註誤去事白遂徜徉林泉以終祀鄉賢子世仁仕至廣西左江道

杜國傑字作賓河津人幼孤事母孝家貧力學由恩貢任金華府通判修舉廢墜攝東陽署府篆所至有惠政升西安同

知致仕歸時軍需孔急貧民力不能償輒爲代輸卒祀鄉賢
金華人祀名宦子李寅任長沙知縣亦有聲

任之琦字介石河津人性孝友辛卯膺鄉薦授山東掖縣令
下車釐剔陋弊民困以蘇升刑部主事遷員外郎參決平反
稱明允尋升戶部郎中出知江南太平府署廬鳳道事歷任
二十餘年絕饋餉杜漕規清隱占善政甚多以引年歸里年
八十二卒祀鄉賢

李生光字闇章絳州人未冠爲諸生聞辛復元倡學河汾遂
往受業質疑問難無虛日生平篤於躬行事親至孝復元深
重之甲申之變北向痛哭焚其青衿自號汾曲逸民構草堂
日夕燕處其中讀書自得諸弟子羅列其下談經課藝外訓
以二南大義程朱微言所成就者衆著有儒教辨正崇正黜

邪編凡萬餘言衛道之力甚勇又著正氣猶存西山閣筆友于集諸書皆直寫胸臆以淺近語寓覺世牖民之意其處子吟曰東鄰有處子夙明烈女篇字人尙未嫁而乃失所天痛之生命薄守貞期自全毀容絕膏沐矢志窮益堅愛人貴以德姑姊莫相憐侃辭謝媒妁何用曰譏譏是可以見其志矣党成字憲公絳州人前明諸生學以朱子爲宗以明理去私爲本生平不求人知人卽知而樂道之終非其志也州守前役表宅里士大夫公舉純孝舉實學州守貰其租庸成皆若罔聞知魏敏果公屢遺書商學業說士品太守袁公禮幣式問敦請開講范彪西亦揚之於觀察張郡守梁成聞之皆遜謝意甚不懌時以古狷者推之於朱陸異同辨論甚精世稱冰壑先生冰壑者以所居山崖下有前明藏冰地因自號云

陶世徵字祖菴絳州人與李則章党冰壑同學購書數萬卷
儒先諸錄蒐輯殆盡每朔望集生徒及里中後學口講指畫
諄復不厭以貢生終與兄註並祀鄉賢註字惟道亦明諸生
居嘗讀書閉戶端坐靜研義理著有學庸心領

湯家相字賓我趙城人順治己丑進士知常熟縣清而不刻
民愛之前令爲御史所劾繫蘇獄家相力雪其枉御史力駁
之不顧也會以逋稅當削職士民爭輸金且慫恿上辯家相
曰令不麗於法而麗於例何辨爲脫屣去送者盈塗楊子常
彝邑宿儒也年八十久絕迹公府聞其行急詣遼山蕩送焉
久之事白補南漳知縣南漳介萬山中甫蒞事而寇至堅壁
授徐秦二守備方略斬僞將馬臣孫信寇不敢復出乃招難
民墾荒田六百頃有奇修築永泉八觀水利南漳民始蘇以

病歸送者如常熟時

以上各州屬

右順治年七十六人